

## Sita 165 tong LPG



SEBAHAGIAN tong LPG yang dirampas. FOTO Ihsan KPDNHEP.

Amirul Aiman Hamsuddin  
am@hmetro.com.my

KEMENTERIAN Perdagangan Dalam Negeri dan Hal Ehwal Pengguna (KPDNHEP) menyita 165 tong gas petroleum cecair (LPG) bernilai RM 35,727 dalam serbuan di sebuah rumah di Kampung Tanjung Keramat, Kuala Selangor Rabu lalu.

Pengarah KPDNHEP Selangor, Muhamad Zikril Azan Abdullah berkata, serbuan pada jam 9.20 malam itu dijalankan sepasukan enam anggota KPDNHEP susulan aduan orang awam.

"Hasil serbuan, kami menemui tong gas di atas dua lori jenis Isuzu dan Daihatsu dengan muatan masing-masing satu tan yang diparkir di kawasan berpagar.

"Pemeriksaan lanjut mendapati perkarangan rumah turut dijadikan tempat menyimpan barang kawalan bersubsidi itu" katanya dalam kenyataan media, hari ini.

Beliau berkata, pemilik rumah berusia 53 tahun gagal menunjukkan dokumen yang membenarkan untuk menyimpan barang kawalan bersubsidi LPG.

"Jadi, kita merampas 95 tong gas berisi dan 70 tong gas kosong yang mana setiap satu seberat 14 kilogram.

"Siasatan lanjut masih dijalankan dan kes disiasat mengikut Akta Kawalan Bekalan 1961," katanya.

Artikel ini disiarkan pada : Ahad, 9 Februari 2020 @ 1:02 PM